






Reverit n<sup>o</sup> 55

7




















# LE CENSEVR,

DISCOVRS D'ESTAT.

*pour faire voir au Roy, en quoy sa  
Majesté a esté mal servie.*

*Le discours avoit été imprimé sous le règne de Henry IV et supprimé  
en 1609. on le publia de nouveau pendant la tenue des états généraux  
sous Louis XIII, avec les dates de 1615, on y ajouta seulement la première  
lettre. vers. 1615 page 599*

M. D C. XV. (Paris 1605)

CASE

F

39

1326

16150002

THE NEWBERRY  
LIBRARY

---

# LE CENSEVR, DISCOVRS D'ESTAT

*pour faire voir au Roy, en quoy  
sa Maiesté a esté mal seruie.*

**L**Es Roys, Princes & Poténtats souuerains,  
n'ont point de fondement plus assuré  
pour establir leur auctorité, leur repos & l'as-  
surance de leurs personnes que l'affection &  
la bonne volonté de leurs subjects.

Le fondement de cet amour consiste en  
l'esgalle distribution du loier & de la peine,  
c'est à dire de la recompense & du chastiment  
qui doit aussi tousiours estre fondée sur les  
deux Ordres de la religion & de la Iustice, car  
la pieté oblige à l'un, cômme la Iustice condâne  
à l'autre, c'est pourquoy les Princes qui veu-  
lent regner heureusement doivent en toutes  
leurs actions obseruer les effects de ces deux  
sainctes regles, par ce que lors qu'il arriue  
quelque confusion ou desordre en l'une, le  
peuple est aussi tost malcontât & diuisé, d'où  
naissent les guerres ciuiles & partialitez qui  
mettent les souuerains en peines infinies, &  
hazards tant de leurs personnes que de leurs  
Estats.



4

Encor est il plus dangereux, quant le desordre s'introduit dans toutes les deux, & que l'impieré & l'iniustice ( leurs contraries ) regnent en leur place d'autant que de la naissent les mescontentemens & desespoirs generaux qui disposent les subiects de leur affection, & les affranchissent de toute crainte, n'estant possible qu'il reste de la bonne volonté a vn peuple que telles causes ont porté a l'indignation & a la hayne n'y qu'il yayt de la crainte ou l'iniustice a estably l'impunité des vices & toute confusion, puis que de la s'en gendre la licence de mal faire, & de contreuenir a toutes les loix.

Et puis qu'il est vray que l'ordre de la religion & celuy de la Iustice estant alterés ou renuersez, la Police & la societé publique se trouuent aussi tost troublee & par consequent la consideration de tous debuoirs mise sous le pied par le regne du mescontentement au desespoir general qui s'en engendre lequel n'a iamais lieu qu'il ne face aussi tost n'aistre des factieux & des factions.

Il reste maintenant à voir s'il y a trouble ou confusion dans ces deux ordres ou en quelques vnes de leurs fonctions & s'y cela est quel mal on en doit attendre mesprisant d'y apporter le remede necessaire.

Je ne marresteray point a représenter particulièrement le desordre qui s'est mis depuis cinquante ou soixante ans dans nostre religion, n'y les malheurs que ses effects ont apporté

5  
dedans ceste monarchie, par ce que nos propres yeux & le ressentimēt des maux qui nous en sont arriuez & qui en naissent encor tous les iours nous en donnēt tāt de cognoissance que personne n'en ignore la cause n'y les accidens.

Je diray seulement en passant que le plus beau, le plus entier, & le plus florissant Royaume qui soit sous la voulte du Ciel se trouue changē & diuisē en deux diuerfes souuerainetez, l'vne tenant tousiours nature de Monarchie Royale, l'autre de Democratie Aristocratique.

*La France  
diuisē en  
deux sortes  
de souue-  
rainetez.*

En la premiere le Monarque est encor absolument recognu, mais subiect a tant d'aprehensions sur la regle de ses deportemens que chacun controolle, que biē souuent il ne croit pas estre le plus heureux de sō estat: en l'autre l'auctorité du Prince est tellement rauallee qu'il n'est plus qu'un simple protecteur, a qui on paye quelque tribut & sur lequel on tasche tous les iours d'empieter quelque chose a son dommage.

Je diray aussi que le Roy ayant a son aduenement trouuē ce desordre estably dans son Royaume, a commencē par sa prudence assistē de la grace de Dieu & poussē des inspirations de son saint Esprit, d'y dōner le vray & seul remede qu'il y falloit apporter, s'entend seulement pour ce qui regarde l'establissēmēt de la societé entre son peuple, au lieu de la division qui s'y voyoit auparauāt, & à la verité

6  
ce remede a esté de tel fruiçt qu'on a desia veu  
arriuer plusieurs bons succez.

Il reste encor toutesfois quelque Police a  
establi parmy les gens d'Eglise dependans  
de la souueraineté Royale, & en la forme de  
posseder les biens Ecclesiastiques.

Mais parce qu'il faut de necessité que le pou-  
voir de sa Saincteté introuienne en ce faict  
par la requeste mesme de sa Maiesté ie n'é di-  
ray autre chose pour ceste heure. Et me con-  
tenteray de ne faire voir seulement sur cet ar-  
ticle qu'a faulte d'observer vn des effectz de  
la pieté, qui se prend pour l'esgale distributiõ  
du loyer ou recompence de ceux qui ont bien  
seruy. Et de la satisfaction, ou remboursemẽt  
de ceux qui ont presté leur bien au Roy en la  
necessité de ses affaires. Il arriue vn mal fort  
contraire au bien de l'estat, qui est que l'af-  
fection naturelle d'un grand nombre de gens  
de bien en demeure alterée, Les vngs estans  
mal contens pour n'estre payez & satisf-  
faits de ce qu'ils ont volontairement presté  
pour suruenir comme il est dict aux plus vr-  
gens affaires de sa maiesté. sous la foy d'elle  
de son Conseil, & de ses Cours souueraines,  
les autres pour n'estre recompensez des ser-  
uices qu'ils ont rendus aux perils de leurs  
vies & detrimẽt de leurs familles.

*Cause que  
faict iuger le  
Prince sans  
pité biẽ qu'il  
n'ait rien si*

Or le mal que ce desordre peut apporter  
est que bien souuent on voit que ceux qui  
sont mal contens pour ce subiect se persua-  
dent & croient apres que le Prince est sans



naturel sans charité & sans aucune recognoissance de ce a quoy l'honneur l'oblige. Et par consequent entre eux mesme l'accusant d'impieté & d'iniustice bien que le mal procede de ses ministres & non de luy.

De la vient que si le nombre de telles personnes est grand, la liberté de se plaindre & de mal parler du Prince est du tout ouuerte, & chascun interessé entend volontiers la plainte de son semblable, pour y ioindre les raisons de la sienne selō sa passion. Et en l'habitude des trop libres discours de la vie, & des comportements du Prince, le mescontentement se tourne bien souuent en hayne, Et en mespris d'ou naissent les actions desesperées.

Car il est certain qu'on ne se peut accoustumer à mal parler souuēt de quelqu'un qu'on ne prenne aussi l'habitude de le hair & le desestimer principalement quāt on croit en estre mal traicté comme font ceux qui croient qu'on leur retient iniustement leur bien & le travail. Et qui s'en prennent a leur Prince, dont on voit aujourdhuy bon nombre dās nostre France, ou ceste retention de la peine & du bien d'autruys s'exerce, contre le naturel inclination & la volonté du Roy duquel on peut dire sans flater qu'il n'y eut iamais Prince plus misericordieux plus charitable ny plus pitoyable.

*On ne peut plus souuent mal parler de quelqu'un qu'on ne s'accoustume aussi a le hayr.*

*Le angelus Roy.*

On demandera parauenture d'oū vient donc ce deffault, a quoy on peut respondre qu'il procede de la grande bonté, & trop de confiance de sa maiesté vers ses seruiteurs, &

de l'autorité trop absoluë qu'elle dōne à quelques vngs d'entre-eux qui luy representēt ses affaires en l'estat que bon leur semble, Et selon leurs passions particulieres, contre lesquels cependant les autres n'oseroient parler ny s'opposer de peur de mescontenter sa majesté.

Et affin de faire voir plus clairement que l'iniustice qui se rend en ceste retention du bien & de la peine des subjects ne viē du Roy ny de corps entier du conseil, Ains seulement de quelques vns des principaux Conselliers, ie diray que tous les interessez en cēt affaire porteront soubz le seing, & soubz le Seel de sa Majesté & de son conseil, bien verifié aux Cours souueraines de quoy iustificier que leurs demandes ont estē trouuees, tres-iustes, ce qui monstre bien que leur mal ne vient que de quelques vns qui veulent faire ce mesnage pour eux, aux despens du repos de l'estat, & empescher l'execution des iustes volontés du Roy.

*Dangeruse  
proposition  
contre l'E-  
stat.*

Cependant cecy est de telle consequence outre ce qui est du fait des subiets que la France perd son credit entre les nations estranges d'autant que les plus grandes debtes sont deuës aux estrangers, ausquels on donne aussi peu de satisfaction qu'aux François mesmes?

On propose encorē vn mesnage plus dangereux pour le Roy, car outre ce qui est dict, on veut disposer sa Majesté a abolir les pensions, & oster les recompenses ou satisfactiōs donnees par les Roys ses predecesseurs, disant que

que toutes les rentes qui sont créées pour dons & recompenses, ou debtes prouenant des despeses faites par leurs Majestez, soit dedans ou dehors le Royaume, doiuent estre declarees nulles, ce qui ne sera de petite importance, attendu que la plupart de telles constitutions n'ont esté faictes qu'aux Princes, Seigneurs, Officiers de la Couronne, Ambassadeurs & autres personnes qualifiees, plusieurs desquels sont morts, & leurs heritiers ont partagé lesdictes rentes, & vendu & transporté bone partie d'icelles, dont ils seroient appelez a garants, ce qui engendreroit infiniz procès & querelles entre les meilleurs familles du Royaume, & par consequent vn mescontentemēt, & haine cachée contre sa Majesté.

Il y a vn autre mal, que produict ce reffus ou desny du loyer & de satisfaction, c'est que personne ne sert plus de la en auāt que par art & avec dessein, & on croit que l'industrie vaut mieux que la fidelité & l'affection, d'ailleurs si le Prince est viel & incōmodé de sa persone, chacū tasche a faire proffit de sa cheute, & ainsi biē souuent le Prince est seruy de ses ennemis, pensant l'estre de ses seruiteurs bien affectionnez & la raison est que l'esperance du loyer estant ostée, on essaye de prendre ou acquerir le loy mesme par toutes voyes obliques ce qu'on eust attendu de la seule volonte & liberalité du Prince.

Je sçay bien qu'on dira qu'il est malaisé a vn Prince qui vient de sortir d'vne longue, & pe-

*Les Princes  
sont ordi-  
nairement  
seruis selon  
qu'ils sont  
estimez.*



nible guerre, qui est desnüé de finance, & endebté de toutes partz de pouuoir rembourser le prest des vns, & recompenser le trauail & la perte, des autres.

Et a la verité ceste difference auoir quelque apparence si on ne pouuoit faire voir qu'il a esté, & est facile de satisfaire a l'un & l'autre en partie par effects & en partie par esperance, & que ceux qui ont eu a manier les principaux affaires de l'estat & par consequent le cœur des subiects, pouuoient empescher ce mescontentement & en oster les plus iustes pretextes, au lieu qu'il semble qu'on tasehe a l'augmenter, voire a le faire saulter iusques aux termes du desespoir, par le mespris & mauuais traitement qu'on faict souffrir a ceux qui poursuiuent leurs iustes pretensions, ostant a chacun non seulement l'esperance d'estre vn iour contenté du passé, mais aussi toutes sortes d'esperance, d'estre recompensez des seruices de l'aduenir, ce qui se cognoist par la suite de ce dicours traictant de la Iustice & des finances.

*Desordre  
de la iustice.*

Et parce que la confusion & le desordre qui sont introduicts dans la Iustice de ce Royau-  
metirent a plus de consequence, ce que ie viés de dire y estant compris, & plusieurs autres faicts d'importance, qui peuuent non seulement porter le peuple a vn mescontentement general, mais a vn desespoir dont il ne peut arriuer que de tresmauuais effects i'en traicte-  
ray plus particulierement & par ordre.

Et croyz qu'il est a propos de faire entendre

qu'il ya de deux sortes d'iniustice, l'vne qui semble proceder du propre mouuement du Prince ou de son conseil, l'autre en general des officiers de la Iustice distributue,

Celle qui semble venir du Prince, & dont nous venons de parler au discours de la pitié consiste en la faute de recompense a ceux qui ont bien seruy & de satisfaction a ceux qui en bien seruant, ont encor presté leur bien, dont ils souffrent incommodité: Et ces deux sortes

de personnes croient en leurs ames, leur estre fait vne grande iniustice qui mescontente les plus gens de bien, & desespere les autres, Cependant ceste iniustice en quelque souueraineté quelle se puisse commettre, ne peut venir du Prince, quant luy & son conseil & ses Cours souueraines ont ordonné le contraire: Et qu'il ne reste quel'execution de son ordonnance qui est empeschée ou retardee par quelques particuliers: quoy que le peuple n'estant bien esclaircy d'ou luy prouient ce mal, croye que c'est par l'intelligence & par la volonté du Prince principalement lors qu'il ny remédie.

L'autre sorte d'iniustice qui semble venir des officiers de la Iustice & dont on ne laisse de se prendre au Prince quant il la tollere longuement, vient de la forme indirecte dont les officiers vsent, ordonnans & disposans de la vie, de l'honneur, & des biens de ceux sur qui leur puissance & auctorité s'estend.

Et à la verité si Dieu n'inspire le Roy a establir quelque ordre, il ny aura bien tost plus de Iustice parmy nous que le nom & l'apparence exterieure,

*C'est commettre impicté & iniustice tout ensemble*

*Ceste sorte d'iniustice ne vient du Prince, ains de quelques particuliers de son conseil.*

*Iniustice des Officiers d'où on se prend au Prince.*

Car en premier lieu l'impunité des vices est tellemēt en credit que la licēce deles cōmetre a'du tout la bride laschee, ce qui est si facile a iustifier qu'il ne faut quece represēter ce qui a esté fait depuis peu a Paris a la face des estats du Royaume contre le Roy & le premier Parlement du monde sans en auoir esté fait iustice aucune, que voir aux Greffes de quelques vnes des Cours souueraines & iurisdiccions inferieures de ce royaume ou on trouuera vn nombre incroyable de procez criminels, de routes sortes, les plus reprehensibles, qui sont indecis & penduz au croq, & vne infinité d'iniustices qui se sont faites a plusieurs particuliers au grand preiudice du Roy & du public.

Et en ce qui regarde les fonctions de la Iustice Pour ce qui est de la decision ciuile des biens temporelz, il ny a plus d'obseruence de droit ny d'equité en la pluspart, & les plus saintes loix & ordonnances ne seruent plus que d'ornement de langage aux Aduocats qui en plaident & debattent les causes, aussi, y a il vn nombre infiny de personnes dont les iustes pretensions, soit pour crime ou pour ciuil crient Iustice à Dieu & au Prince n'en osans toutesfois entreprendre la poursuite ne sentans ny faueurs ny argent & sachant bien que leur bon droit seroit inutil sans ces deux Arcsboutans

*Tyrannie  
des Officiers  
dont on se  
prend au  
Prince.*

Et ne faut pas douter que de ceste espece de tyrannie rendue principalement par les officiers inferieurs & subalternes on ne s'attac-



que du tout au Prince, Car celuy de qui on a meurtry le pere le frere ou le fils & celle de qui on a assassiné le mary ou l'enfant sans leur en rendre iustice croient que le Prince en est a blasmer, qui leur doibt la satisfaction de leur iuste vengeance, & celuy qui pert son bien, pour n'auoir moyen d'en pouruiure la restitution, ou parce qu'il luy est vsurpé par quelque Officier ou quelque autre personne plus riche & plus fauorisé que luy pour gagner & suborner les Officiers de la iustice, se prêt au Prince du dommage qu'il en reçoit, veu mesme que lesdits Officiers scauent fort bien représenter leurs excuses, & dire que leur nombre est si grand qui est cause des caballes qui se font parmy eux, pour adoucir changer & retarder, les iugemens & empescher que les voix des gens de bien ne soient suiuiues par l'opposition du plus grand nombre des autres.

Et sur ce qu'on les taxe de n'auoir plus de regle ny de borne en ce qu'ils prennent de leur auctorité priuée pour leurs salaires, rapports, taxations droicts & espices, ils disent qu'ils n'en sont coupables ains, le Roy ou son conseil pour la quantité d'inuentions dõt on haulte de iour en iour, le prix de leurs offices par taxations supplemens ou augmentations de nouueaux Officiers ce qui les force aussi de haulte le prix de leur salaire & taxations.

Que sion ce plainct encores qu'ils ne rendent aucune iustice aux pauures c'est à dite,

*Excuses  
masquées de  
quelques  
raisons dont  
les officiers  
de iustice &  
de finance se  
seruent pour  
se descharger  
sur le Prince  
& sur son  
conseil.*

*Impiété des  
Officiers  
qu'on rejette  
sur le Prince  
pour le ren-  
dre mal vou-  
lu.*

a ceux qui n'ont moyen de poursuiure leurs Iustes demandes, soit pour crime ou pour ci- uil, ils respōdēt que telles gens ne pounās ai- der a les rébourser de ce quileur a cousté pour acquerir l'honneur de distribuer ou admini- strer la iustice, ils ne croient estre tenuz ny obliger les seruir sans vtilité.

Cecy est vn langage que l'on entend tous les iours prononcer tant aux officiers de la Iustice que des finances le tout tendant a cou- urir & excuser leurs crimes & la tyrannie dont ils vsent sur les subiects du Roy pour en char- ger la conscience, & l'honneur de sa majesté, & rendre son peuple non seulement mal con- tēt, mais animé cōtre sa personne, car en tous Gouvernemēts souuerains les subiects croyēt que leur Prince ne leur doit rien au monde que la Iustice & qu'il ne tient son estat qu'a ceste condition sans l'obseruance de la quelle ils estiment estre dispensez du serment de fi- delité.

Cependant l'iniustice apporte ce mal que l'affection des plus gens de bien en demeure alterée, & que le nōbre des ennemis, du Prince & de l'estat croist de iour en iour par ce que tous coupables & criminels qui apprehen- dent tousiours le chastiement qu'ils cognois- sent auoir meritē, sont en leurs a mes enne- mis du Prince desirant de le voir perpetuelle- ment en trouble, afin d'euitier par la la confu- sion leur peine meritee.

*Les culpa-  
bles & cri-  
minels sont  
ennemis  
mortels de  
leurs Prin-  
ces.*

Et de la vient que iamais les estats remplis de telles personnes ne sont sans factieux ny

sans factions a quoy les gés de bien mal contents voire indignez, pour les causes alleguees nes'opposent, ains laissent trainer deuant leurs yeux lesdites factions & bien qu'ils ne suyent que des conspirateurs, ils ne sont pas toutes-fois marris de voir conspirer disant entre eux qu'ils auoiēt desplaisir de voir arriuer mal au Prince. Mais qu'ils seroient bien aises de luy voir donner quelque coup de la Verge de Dieu qui le peust r'amener à la cognoissance de ce qui se passe, au preiudice de son ame de sa reputation, & de leur interest particulier dont ils le croient seul garent & responsable deuant Dieu.

Que s'il est vray comme il n'en faut point doubter que l'ordre de la iustice soit tellement destruite qu'il se puisse visiblement monstrer que le peuple paie plus le tribut à l'injustice de la iustice notamment aux iurisdicções inferieures & subalternes qu'au Roy mesme, & que la confusio qui s'y remarque pueda la langue faire naistre quelque malheur, les Ministres de l'estat au moins ceux qui sont cause du desordre me pardonnerot, s'il leur plaist, si ie dis qu'ils seront blasmez de ne chercher remede à ce mal, & de laisser ruiner vn des principaux pilliers de l'estat sans lequel nulle monarchie ny republique ne peut subsister.

Que s'ils disent y auoir faict ce qu'ils ont peu, & que le Roy veuille entendre les raisons qu'on luy peut alleguer au contraire, sa Maiesté demeurera satisfaites de la verité, & verra que dans trois mois, elle peut sans d'espence

*Raison pour  
monstrer la  
faute que  
commettent  
les Conseils  
des Princes  
quant ils les  
portent a  
quelque mal  
& ala veri-  
té ceux là  
meritent  
double puni-  
tion qui sera  
uans un  
Prince  
Religieux  
Et bon, luy  
font inuisi-  
blement com-  
mettre des  
actes d'im-*



*phère et d'in-  
iustice, Et  
aux estats  
bien regler  
Les Conseil-  
lers sont ga-  
rents de  
leurs cōseils,  
Et en patif-  
sent quant  
ils apportēt  
du mal.*

ny trauail remettre les cœurs de ses sujets en  
ses mains, Et que le mal tournera sur ceux qui  
en sōt veritables causes & ausquels il n'est pas  
possible de représenter quelques excuses ou  
deffence qui puissent empescher le peuple  
voire les plus grossiers esprits de les accuser  
d'auoir eu les yeux bandez en la cognoissance  
du biē. & du repos de l'estat ou de croire qu'il  
y a eu du desseing de le porter à vne subuer-  
sion ou ruine entiere.

Il y a tant de subiect de s'estendre sur ce dis-  
cours, & sur la faute inexcusable que font les  
Conseillers & Ministres des Estats ou repu-  
bliques qui n'ont perpetuellement leurs ima-  
ginations attachees au maintien de la iuste  
distribution qui s'en doit faire que le dis-  
cours en seroit trop long & ennuyeux.

Il y auroit encor plus de superfluité de lan-  
gage qui voudroit représenter particuliere-  
ment toutes les sortes d'injustices qui se ren-  
dent par les officiers tant de la iustice que des  
finances entre lesquels neantmoins il ne laisse  
de rester plusieurs gens de bien particuliere-  
ment dans les Courts souueraines desquelles  
ie n'entends parler sinon de quelques vnes, &  
non pas toutefois des corps entiers, par ce  
qu'en ceux-là mesme il ya vne partie des Ma-  
gistrats & Senateurs qui sont tresmarrie du  
desordre qui s'y commet.

Ie me cōtenteray dōc pour ceste heure de ce  
que i'en ay dict affin de traicter aussi quelque  
chose des Finances ou il se faict vn mesnage si  
pernicieux & si contraire a la manutention  
del'estat

de l'Estat que del'a vient pour certain le des-  
ordre dōt il est parlé cy deuant, & qui est cau-  
se qu'on peut avec Iustice accuser d'impieté, &  
d'iniustice, ceux qui l'establisent.

Le premier mesnage qui s'est faict aux finan-  
ces a esté tel qu'on a regardé seulement à faire  
que les comptables payassent plus prompte-  
ment les deniers du Roy, & a leur oster le  
moyen de s'en seruir quelque temps cōme ils  
faisoient, ce qui eust esté vn bon acte si on eust  
preueu a empescher lesdits cōptables & autres  
Officiers des finances, de faire porter double-  
ment au peuple l'incommodité que ce regle-  
mēt vous apportoit, mais tant s'en faut qu'on  
y ayt estably quelque ordre, qu'on leur a laissé  
toute licence de mal faire, ouuerte d'ou est ve-  
nule premier mescontentement, & qui fait  
voir que le mesnage des Monarchies n'est pas  
comme L'œconomat des familles particulieres  
d'autant qu'il se peut faire infiniz profits &  
augmentations aux reuenus des souuerains  
dont la suite & la consequence tourneroit a  
la fin a leur plus grand dommage, comme de  
faict il se remarquera que ce reglement qui de  
foy est bon, a plus apporté de mal que de bien,  
faute d'vn peu de soing, par ce que au lieu d'v-  
ne petite vtilité, que le Monarque en a receuë,  
la Monarchie en reçoit vn dommage beau-  
coup plus grand; & quia la longue peut tour-  
ner sur le Monarque mesme, puis que ses sub-  
jects en sont ruinez.

Depuis ce premier mesnage il me semble  
qu'on a eu autre dessein que d'amasser de lar-

gent d'une façon qui peut ruiner l'Estat au lieu de la conseruer, car on monstrera au doigt & a l'œil, lors qu'il en sera temps, que tous les Edicts declarations, lettres patentes, & commissions qui se sont expediees depuis six ou sept ans tant pour leues de deniers extraordinaires, creation de nouueaux officiers, supplement de leurs taxes, que pour ventes, reuertes alienations du Domaine, & pour recherche des maluersations commises par lesdicts officiers de la Iustice, & des finances ont esté ruyneuses a la Majesté & a son peuple & qu'on laisse voire reietter plusieurs inuentions d'augmenter les finances, au contentement de son peuple pour en prendre a son détrimet.

Et afin qu'il ne sēble que ce discours soit fait a la volee s'as estre appuyé de toutes les raisons qui en peuuent veriffier les propositions, ie presenteray seulement quatre ou cinq sortes de mesnage ou augmentation de deniers qui se sont faicts de fraische memoire ausquels on cherche vn petit gain pour faire vne grande perte voire pour ruiner l'Estat.

*Mesnage  
pour croistre  
le desordre  
de la Iustice  
Et par con-  
sequent pour  
ruiner l'E-  
stat.*

Le premier a esté contre la Iustice, & pour en augmenter le desordre par la creatiō des Lieutenāts accessseurs criminels, qui a du tout ruiné l'ordre de la Iustice, & oste aux Iuges la volunté de l'administrer selon le debuoir, car ça esté proprement vn tribut qu'on a prins sur tous les Iuges & chefs de la Iustice qui leur a cause mille pertes particulieres, & desplaisirs a chacun d'eux, outre infiniz procez, entre les nouueaux establis, & les anciens dont la pluspart



en fin se sont accordez aux despens du peuple, & resolut deluy faire porter le dommage qui a la longue tournera sur le Roy, lequel cependant blesse sa conscience, & diminué l'estime de sa reputation tant parmy ses subiects que les Princes estrangers quoy qu'il ne soit blasmable de ce fait n'en estant instruit & se reposant sur ceux qui manient les affaires.

L'inuention qui a esté trouuée de faire exercer la Iustice par party, est encor plus ruineuse *Injustice inique plus importante qu'on a pense.* car il n'y a rien si inique que d'assigner les vacations, & les salaires du Iuge sur les condamnations qu'il doit faire, ce que toutesfois se practique aujourd'huy de telle sorte que si vn Iuge est depuré pour aller informer de quelque maluersation, il faut qu'il face l'aduaice des fraiz de son voyage sans esperer d'en estre recompensé que sur ces Iugemens, & s'il ya quelqu'un qui face party des amendes & confiscations qui peuent prouenir desdites recherches, il faut qu'il scache le secret des Iuges & qu'ils s'accordent en semble, qui est vn vray moyen de corrompre les plus gens de bien & dont il arriue vn si grand inconuenient que tous les riches coupables se sauuent, & les pauures seulement perissent sans vtilité pour le Roy ny pour le public.

La raison est que le procez d'un riche coupable est plus malaysé a faire, ayant plus de moyen de regagner les tesmoins, d'appeler, de recuser & de pratiquer des faueurs & par consequent retarder le iugement de son procès voire mesmes en corrompant bien sou-

uent les Iuges ou commissaire qui voyâts ceste confusion perdent tout courage de bien tra-uailer & ne regardent qu'a chercher le fonds pour leurs fraiz sur ceux qui n'ont moyen de fournir a la d'espence de telles prolongations & qui pource subject payent plus promptement les petites amendes à quoy ils sont condamnez & cependant tirent le plus souuent quelque present des riches pour les laisser libres lesquels se remboursent apres sur le peuple.

Le troisiéme mesnage, Auquel il se commet Iniustice est le party du Sel, ou la Majesté fait perte de quatre cens mil escus tous les ans outre l'incroyable tyrannie, qui s'exerce sur son peuple par les partisans & leurs associés qui tous ensemble ont eu cét artifice de faire entrer en leur party des principaux aupres du Roy des gens du Conseil des Magistrats des Cours souueraines & quelques gouverneurs des Places & Forteresses, le tout pour les maintenir ! ce qui a reduict le peuple en tel desespoir que la Majesté sçait qu'en quelques Prouinces on a commis des rebellions a la Iustice & ses Hussiers battus & outragés, par plusieurs gentils-hommes chose de pernicieuse consequence & qui n'est arriuee que par ceste belle inuention de mettre le sel par Impost laquelle a donné plus de travail au peuple que ce qu'ils payent de la taille & cependant les partisans & leurs associés par leurs faueurs & pensions sont tellement supportez qu'ils font auctoriser leurs violences & font que le con-

seil treuve bonnes toutes leurs raisons quoy  
que friuolles au grand preiudice de sa maje-  
sté & au mescontentement de son peuple de  
quiles plainctes ne sont plus escoutees les af-  
faires estans en tel estat.

Le quatrième Mesnage a esté le bail des Ay-  
des ou sa Majesté faict perte de plus de quatre  
millions de liures qui luy ont esté offerts &  
qui tournēt au profit de quelques particuliers  
qui deburoient estre ses meilleurs seruiteurs &  
que d'ailleurs elle a assez obligés pour les em-  
pescher de luy faire ce deseruiue.

Il ya d'aduantage contre l'estat cest qu'en  
l'exécution de ce bail, on mescontēte dans les  
Prouinces vn nombre infiny de personnes de  
qualité, Ecclesiastiques, nobles & Iusticiers dōr  
le mescontentement ne seroit raisonnable si  
l'vtilité qu'on leur oste retournoit au Roy,  
parce que cest son bien Mais ils sont marris  
qu'on prend sur eux pour enrichir d'autres  
qui sont moins recommandables & que d'ail-  
leurs ils voyent ceux qui ont des rentes ou ar-  
rerages d'icelles a recueillir sur les fermiers  
n'estre mieux payés qu'auparauant dont il se  
fera bien tost de grandes plaintes principale-  
ment des concussions exactions & compo-  
sitions que ledict fermier & les commis font  
sur toutes sortes de personnes sans respect de  
qualitez ou merites par le moyende l'inique  
permission qui luy en esté donnee dans son  
bail ou il est expressement dict que luy ny ses  
dicts commis ne pourront estre recherchez  
de tels commis, ô que ceste Iniuste licence dō-

*Autre man-  
nais mesna-  
ge veriffié  
par les offices  
qui ont esté  
faictes au  
profit du  
Roy sur les  
deux fermes  
de aydes &  
gabelles, en  
ce Mesnage  
il se commet  
de grandes  
iniustices con-  
tre le Royle  
public & les  
particuliers.*

*Grande in-  
iustice sur le  
public.*



ne scandale au Conseil, Et particulièrement à ceux qui portent si passionnément les fermiers lesquels ne se pourront vnjour excuser sur la consequence de cét article non plus que d'auoir faict perdre au Roy quatre cens mil liures de reuenu annuel avec trois millions de liures de deniers d'entrees pour vne fois qui ont esté offerts a sa Majesté depuis peu sur le terme des aydes & gabelles outre & par dessus ce qu'on en a payé a present toutes leurs procedures violentes qui ont esté recueillies soigneusement seront les vrayz tesmoins pour la verification de leurs fautes & les propres arrests, d'où ils ont condamné aux amendes & folles encheres ceux qui procuroyent ceste vtilité au Roy, & a son peuple les feront iuger coupables quelque déguisement qu'ils y ayent peu apporter à quoy seruiron encor les iniures & ontrages qu'ils ont faict souffrir en plain Conseil a ceux qui par debuoir il falloit cherir & traicter plus doucement veu l'vtilité de leurs offres & ce qui est plus dangereux en ce faict, cest que ce mauuais acte commis contre le seruice de Roy, & le bien public n'est seul.

*Iniustice contre le Roy mesme.*

*Iniustice aux particuliers.*

*Autre iniustice.*

*Artifice pour empescher le Roy & voir son profit & del'accepter.*

Pour preuue de quoy il est a remarquer que depuis deux ans quelques vns ayant presenté des offres d'enchere sur les fermes de Normandie, sur le Sel, sur les aydes & sur le partý de Paulet, ils ont esté pour recompense de leurs viles offres non seulement repoussez ou refusez, mais mal traictez & gourmandez & pour couvrir ceste faute inexcusable, on n'a point faict de conscience de dire a sa Majesté

qu'il ne failloit receuoir ny escouter telles personnes pour rompre les premiers baux & contracts & que ce seroit violer la foy publique bié que cela soit par plusieurs fois executé par ceux mesmes qui depuis ont voulu prendre vn autre chemin, & que quelques vns desdits baux & contracts dont il s'agissoit eussent esté verifiez au besoing, encor' mesmes qu'ils n'eussent esté proclamez publiez n'y affichez par tout ou ils le doiuent estre affin d'en donner la cognoissance au peuple & par ce moyen ouurer le chemin de routes parts d'encherir & faire le profit de sa Maiesté a ceux qui en auroient eul la volonté.

Comme de fait il est certain que s'y les formalitez eussent esté gardees aux baux affermez, & partiz de Montaubon, Rebin Fedeau, & Pault la condition du Roy eust esté beaucoup meilleure, ce qui se recognoist par les offices qu'on a faictes depuis sur lesdits partiz mais tant s'en faut que l'on voulust donner courage à ceux-la qui eussent eu quelque desir de proposer & faire l'aduantage de sa Majesté qu'on a degoutté tous les subjects de l'ozer entreprendre à l'aduenir & voyla cependant le bon mesnage qui se faict dans ce siecle ou les partisans artificieux ont plus de regne que iamais ne manquans d'apuy ny d'art pour se faire maintenir en la possession de leur party, à quoy sa Majesté donnera ordre quelque iour avec l'ayde de Dieu.

Or il est a considerer que ceux qui sous la couuerture de ceste foy publique, veulent em-

*Preuue notable.*

*Pretexte pour couvrir une iniustice*

pescher le Roy de iouir du benefice de relief dont ses subjects se seruent ordinairement pour remedier aux deceptions de toutes promesses, contracts accords, & transports frauduleux luy font iniustice, car il ne peut estre de pire condition que ses subjects, ausquels il se rend esgal en ce fait se conformant aux loix, bien qu'il y ayt des considerations plus expressees & plus estendues pour luy, que pour des Fermiers, & partisans par ce que ce qui est mal pris, desrobé, ou retenu du bien du Prince tombe sur le dos des subiects a la longue, ny ayant rien si certain que la perte & le dommage du Prince sont preiudiciables au peuple comme son opulence & sa richesse luy sont vtils, & c'est pourquoy personne n'a subject de se plaindre de son Prince, quant il se veult remettre en possession de ce qu'il auroit vendu, accordé, ou donné a son dommage, tirant les particuliers ou le public hors d'intrest pour recompense ou desdommagement.

*La perte du Prince tombe sur le peuple.*

*Verité qu'on a deguisee & ceele au Roy pour le tromper.*

Et pour monstrier clairement l'abus qui a esté commis sous l'ombre de ceste foy publique il sera remarqué qu'au bail des aydes faictes à Montauban il est expressement porté qu'il pourra estre depossédé en le desdommageant, & neantmoins le Roy sçait qu'on ne luy a iamais remis autre raison deuant les yeux pour empescher de receuoir les offices aduantageux sur les aydes & gabelles dont on a cy deuant parlé, sinon qu'il romproit & violeroit la foy publique, luy taisant la verité de la teneur dudit bail.

Peut



Peuton parler d'une plus manifeste iniustice *Iniustice con-*  
 contre le Roy, que de ne vouloir pas qu'il *tre le Roy &*  
 rompiſt ce bail ou party, & on a bien permis *les particu-*  
 aux Partisans par arrest du Conseil contre l'or- *liers.*  
 dre de Iustice de posseder les ſoubs fermiers,  
 rōpre les baux qu'ils auoient faictz avec luy,  
 & receuoir des tiercemens hors les temps pre-  
 scriptz par les ordonnances : ceste iniustice  
 comme on peut voir est contre le Roy, & le  
 public, & tout cela fait trop cognoistre que ce  
 n'est pas ceste belle regle de l'entretien de la  
 foy publicque, qui pousse ceux qui la prennēr  
 pour deffence au dommage de sa Maieſté, &  
 du public. On leur pouuoit dire que ce seroit  
 bien mieux garder la foy publicque d'auoir  
 ſoin de faire bien administrer la Iustice, de  
 rendre a ceux qui ont presté, de recompen-  
 cer ceux qui ont bien merité : & de ne pren-  
 dre par force & contre les Loyx de l'estat, le  
 bien des ſubiectz, que de vouloir empēcher  
 sa Maieſté de reprendre son bien, quand elle  
 le trouuera mal pris, ſoubz ombre de ne  
 rompre vn contract authorisé par Caballe, dās  
 lequel sa Maieſté reconnoistroit auoir esté de-  
 ceu.

Et affin de s'interpreter plus clairement sur *Grande in-*  
 l'entretien de ceste foy publicque si passion- *justice contre*  
 nement, & si hors de propos alleguees : est *la conscience*  
 ce pas la violer iniustement d'auoir depossédé *Et l'honneur*  
 par supression, ou autrement tant d'officiers *du Roy.*  
 pauures, & riches, ſans parler des Receueurs  
 de la ville de Paris, apres auoir prins leur ar-  
 gent qu'ils ont ſinacé de bonne foy pour leurs

offices sans leur en faire restitution n'y recompence, laissons a part les autres retentions de la peine, & du bien d'autrui dont il esté si deuant traité: celle-cy est elle pas vne iniustice, qui ne s'exerce en nulle autre monarchie: appellera-on cela conseruer la foy publicque, y a il en ce faict plus de religion, & de iustice qu'a rompre les contracts faicts au preiudice, & desauantage de sa Maiesté, mesmes en desdommageant les contractans, & tirant chacun hors d'intérest. Est-ce aussi garder la foy publicque d'oster par force tant au corps des communautés qu'aux particuliers infinis droicts & priuileges qui leurs estoient acquis de si long temps, & confirmez par tant de Roys successiuiement: voire par la Maiesté mesme au commencement de son regne, sont ce pas inuentions d'aliener où diuertir les volontez, doit-on croire que l'affection naturelle de tant de personnes interessées, & principalement de ceux qui sont offencés a l'honneur & au bien tout ensemble, demeurent dans les bornes du deuiroir sans alteration, & qu'ils n'ayent nul desplaisir de ce voir les vngs des-honorez, & ruinez sans auoir failly, les autres priuez de leurs libertez & franchises au preiudice de leurs anciennes chartres & contracts, que chacun iuge la passion d'autrui par son propre ressentiment, & il adouërera que telles personnes ne peuuent rester contentes, & que ceux qui causent ce mescontentement par leurs mauuais conseilz, & mauuais actions rendent vn grãd deseruice au Roy.

*Ceste procedure aliene  
les Cours &  
les volontez.*

En l'Edit de Paulet le Roy fait encores vne grande perte comme on fera voir à sa Maieſté & oultre ce quelle meſcontète la nobleſſe qui commence à conſiderer qu'après l'auoir priuée de toutes charges, & autoritez militaires durant la paix on luy oſte encor par cet Edit toute eſperance de r'entrer iamais aux charges de la Juſtice, puis qu'on les rend hereditaires à ceux qui les poſſedent maintenant pour la laiſſer inutile, & meſpriſée de ceux, dont elle auoit touſiours eſté honoree.

Et c'eſt la verité que iamais il ne c'eſt fait dans la France vn ſi pernitiex Edit ny ſi propre pour abollir & ruyner la Juſtice, car ceſte diſpence des quarante iours que les officiers acceptent fera qu'ils ſe diſpenſeront auſſi de bien faire, & qu'ils feront porter iniuſtement au peuple le tribut annuel qu'elle leur couſte tout ainſi qu'ils luy ont deſia fait, & font encor tous les iours payer les ſuplements, taxes Empruntz, & autres charges qu'on a tiré d'eux, a cauſe de leurs offices, & les gens de bien meſme ſeront contrainctz d'en vſer ainſi malgré eux pour l'incommodité que ceſte rente & ſurcharge leur apporte, & encor que la diſpence die que c'eſt pour donner courage aux officiers de bien ſeruir conſeruant ainſi leurs offices, ſi eſt-ce qu'ils ne ſuiuront pas le ſens de la lettre pour les garder plus long temps, mais s'en ſeruiront à la meſme inuention du Partisan, c'eſt à dire pour faire leur profit, & ne fault pas douter qu'à la longue ils ne les viennent à bailler à ferme à qui bon leur ſem-

*Mefnage di-  
rectement  
contre le bien  
de l'eſtat qui  
offence la  
Nobleſſe &  
foule le peu-  
ple.*

*Cet Edit  
ruine la Ju-  
ſtice.*

*L'argent  
qu'on fait  
paier aux of-  
ficiers de Ju-  
ſtice & de fi-  
nance eſt  
d'autant de  
ſurcharge ſur  
le peuple.*



blera, & qu'ils ne s'entre-aident, & prestent l'espaule l'un à l'autre pour couvrir les contracts simullez, & les deguisemens qu'ils voudroient faire contre l'intention du Roy & des Partisans, estans seuls Iuges de la caballe qu'ils feront entre eux, & n'en fault esperer que toute confusion, puis que lesdits officiers sont ceux qui portent plus de desplaisir de cét Edit, que lon a feint estre pour leur bié.

*L'autorité  
du Roy ra-  
uallé par cest  
Edict.*

Cest Edict de dispence rend tous les offices patrimoniaux aux Officiers & les tire du pou- uoir de sa Maiesté diminuant son auctorité, & les Officiers sont libres de les garder tant & si peu qu'ils voudront, mesme de les bailler a telles personnes qu'il leur plaira, & est vn moyen d'oster insensiblement au Roy la plus belle & premiere marque de souuerain, luy faisant vendre & quitter le pouuoir de faire des officiers de sa main, & de choisir des hommes doctes & vertueux pour bien administrer la Iustice, car il est certain que les officiers de Iustice ne autres ne seront plus faicts par sa Maiesté ains par le partisan & par ceux qui voudront resigner, a qui l'integrité, la suffisance, & la qualite seront indifferentes pour- ueu que ceux qui se presenteront aient de l'argent, ou qu'ils leur soient agreables pour d'autres considerations, d'ailleurs il est a considerer que Paulet, ou ceux de qui il depend, ont vn grand pouuoir en main de corrompre toutes sortes de Iuges au preiudice du Roy, & du public, & qu'il ny aura criminel qu'ils ne puissent sauuer, ny comptable de qui ils ne facent

allouer le compte quelques faulcetez ou suppositions qui y puissent estre car ils ont de quoy obliger tous les Iuges.

Il est encora considerer que si les ennemis de l'estat veulent, ils peuuent mettre & establir des partisans pensionnaires & factieux dans toutes les Cours souueraines, & aux finances, sans qu'on s'en apperçoie, puis que le Roy est lié, & obligé d'accepter toutes resignations indifferemment, & les Magistrats des Cours souueraines n'oseront plus vser de tant de ceremonies comme ils faisoient au receptions des pourueuz sur la perquisition de leur vie mœurs & religion pour la consequence de leurs enfans ou autres ausquels ils voudroient resigner, & voila comme il sera facile tant aux estrangers, qu'aux autres mal affectionnez a cest estat, de creer des Officiers dont plusieurs gens de bien murmurent comme aussi de la trop grande auctorité que cest Edict donne aux Officiers de iustice, principalement a ceux a qui on laisse tout pouuoir d'exercer sur les autres subjects leurs animositez & vengeance de generation en generation, ce qui les rendra plus redoutables & plus insolens.

Ce bon mesnage est encor vn vray establissement del'ignorance, & par consequent de toute confusion, car il n'est plus de besoin aux Peres de faire estudier leurs enfans, sinon grossierement, puis que leurs offices leur sont fieffez & donnez en heritages par ce bon reglement, qui oste tout moyen de forcer les

*Consideration de grand prix pour le mal qui y peut arriuer a l'estat.*

*Etablissement de l'ignorance.*

hommes d'acquérir par l'estude , les sciences qui les rendent capables de servir le Roy & le public.

*Profit particulier qui peut causer un dommage general.*

On dira que par ce reglement le prix des offices se hausse, & par consequent le fonds des parties casuelles comme il est sans doute, mais cest vn proffit particulier qui ne vient du tout au Roy , & qui tend a ruyner son Estat , & la mesme vtilité , voire plus grande se pouuoit tirer d'une autre façon sans prendre tribut sur les Officiers , ny les charger d'aucune augmentation de prix sur les offices , ains seulement en faisant vn reglement necessaire pour empescher les faulces resignations, & les abus qui se commettent ausdites parties casuelles , en quoy sa Maiesté eust gaigné ce que les partisans profitent qui est beaucoup , comme il se peult iuger par l'appuy qu'ils ont pres de sa personne, & en son conseil, & comme sa Maiesté la peu recognoistre , s'il luy a pleu y prendre garde, & remarquer avec combien de passion on a porté ledit Paulet , sans auoir esgard aux raisons icy representees , soit qu'on les ayt ignorees ou qu'on ayt feinct de les ignorer & si sa Maiesté doubte du mescontentement qu'a porté cest Edict , elle en peut estre bien tost esclarcye prenant la peine de s'en informer.

*Ce mesnage a le bien considerer est tout plain d'impieté & d'injustice.*

On a fait vn autre mesnage contre la conscience l'honneur, & l'vtilité du Roy , en la cōposition des Financiers , par laquelle outre ce qu'on a fait perdre a sa Maiesté, on a preparé l'entiere ruine du peuple , & violé la foy



publicque à dix mil denontiareurs, la pluspart gens de qualité ausquels ou à leurs amis lesdits Financiers auoient vollé & retenu des sommes de deniers, & qui s'estoient affecti- onnez en ceste recherche tant pour le seruice du Roy que pour leur interest particulier, qui toutesfois n'en r'apportent autre fruiet que force ennemis & de la despence qu'ils y ont faicte, ce qui porte vn tel preiudice que nul ne veult plus dire ce qu'il fait, estre passé contre le seruice du Roy, & cela nuit assez à la descouuerture des faulcetez qui se sont commises aux finances, & lesquelles eussent esté faciles à descouuir si la composition eust esté faicte d'une autre façon, qui n'eusse point tendu à obscurcir cest affaire, & priuer le Roy de la grand vtilité qui luy en pouuoit reuenir.

Car bien qu'il soit tres-pernitieux de tirer profit & faire vne partie casuelle de l'impunité des vices, si est-ce que ceste composition, se pouuoit conclurre, & accorder plus aduantageusement pour sa Majesté, & le public, car celle est si pernitieuse qu'il n'est pas croiable que sa Majesté sçache la substance des articles secrets, ny qu'elle les ait veuz, attendu le dommage qu'elle & son peuple en reçoient, estant fort facile de luy faire voir qu'on luy fait tort de plus de trois cens mil escus par la forme de ceste composition, & que ça esté vn tresmauuais mesnage de faire leuer sur le peuple vn million de liures, pour n'en faire toucher que trois cens cinquante mil liures à sa Majesté, & encor soubz des condi-  
*On ne croit pas que le Roy sçache le secret de ce traité.*  
*Les coupables sont ingez des gens de bien, Et les taxent comme bon leur semble qui est une grande iniustice.*

tions des aduantageuses, bref il n'y auoit point d'apparence de raison de tirer trois ou quatre coupables de la prison voire du supplice pour leur faire gagner de l'argent, au lieu qu'ils en deuroient donner pour rachepier leurs vies, & leur honneur, & par vne double iniustice leur donner encor vne espee de tyrannye a exercer sur les menus officiers, ou plustost sur le pauvre peuple qui payera tout.

En fin les coupables qui ont fait le party de ladite composition y gagnent tant que chacun leur offre d'y entrer avec eux, & voila vn exemple bien estrange pour l'aduenir, & vne voye d'empescher le peuple d'oser iamais parler n'y se plaindre de telles personnes, qui par ce moyen seront plus redoutez a l'aduenir qu'ils n'estoient, & auxquels on laisse vn Empire tirannique sur le peuple.

*Cecy est contre l'interect du Roy.*

La forme dont ceste composition est bastie oste au Roy & a son conseil le moyen de cognoistre par quels artifices ou desguisements les abuz ont esté commis & par consequent le pouuoir d'y remedier, au contraire elle donne moyen aux coupables de cognoistre les denonciateurs & tesmoins qui les auoient accusez, de sçauoir ce qui estoit r'apporté contre eux, & de voir en quoy ils auoient manqué à couvrir leurs crimes en les commettant afin d'y remedier d'icy en auant, & en obscurcir avec plus d'art la cognoissance, & Dieu sçayt s'ils se vengeront des accusations & tesmoins, s'il est en leur puissance.

On est encor apres à faire vne plus mauuais mesna-

mauuais meſnage pour ce qui regarde les crimes de faux en cas reſeruez par ladite compoſition, car ſi ſa Maieſté n'y prent garde de prez, on fera eſuanouir ceſt affaire comme les autres taſchant à luy faire croire que le fruit en ſera trop long, & qu'il eſt impoſſible de deſcouvrir le mal qui a eſté commis, qu'avec vne grande deſpence, vn grand trauail, & de longues années, quoy que ceux qui le diſent ſcachét bien le contraire en leurs ames & qu'il n'y a rien plus neceſſaire pour le ſeruiſe de ſa Maieſté que la deſcouuerture des déguiſemens faulxetez, & ſuppoſitions qui ont eſté cōmiſes tant en l'ordinaire, & extraordinaire des guerres, qu'aux viures, Artillerie d'ons, & penſions ſecrettes, dedans & dehors le Royaume, & qu'il n'y a rien ſi facile à deſcouvrir puis quel'hœur à tellement accompagné ſa Maieſté quelle à en main pluſieurs perſonnes qui eſtans venus implorer ſa miſericorde, luy ont confeſſé auoir eux meſmes aydé à fabricquer pour cinq ou ſix cens mille eſcus d'acquiſts ordonnances, & roolles faux, & qui luy promettent faire deſcouvrir la caballe, & les ſecrettes inuentions des finâciers ſur le peril de leur vie, comme ils l'ont faiſt declarer, & ſignifier à quelques vns des plus riches financiers de ce Royaume pour monſtrer l'aſſurance qu'ils ont de veriffier leur dire.

Ceſt affaire eſt de telle conſequence pour le ſeruiſe du Roy, qu'en veriffiant pour vn million d'or de ces deniers mal pris, & neant-

*Inuention,  
dont on s'eſt  
ſerui & dōs  
on ſe ſert en-  
cor pour  
tromper.  
le Roy.*

*Ce ſont mo-  
yens de deſ-  
couvrir faci-  
lement les  
maux paſ-  
ſez.*

*Ceſt affaire  
eſt d'importan-  
ce.*



moins passez & allouez, en les chambres des Comptes par le moyen des susdites faulces pieces, on descouueroit les moyens & inuentions par lesquels on a contrefaict tant de seings pour masquer, & couvrir tât de disguisedemens & suppositiōs, & ceste descouuerture des maux passez ne se peut faire qu'on ne trouue & qu'on ne voye infalliblement le remede pour les empescher a l'aduenir, de sorte que se seroit deux bons effects, que l'on tireroit de ceste seule cause.

*De seruice  
qu'on rend  
au Roy.*

Cependant c'est la verité que ceux qui deueroient rechercher l'esclaircissement de ces larrecins consequentieux, taschent a les obscurcir, & si le Roy vouloit approfondir ce faict & voir s'il est vray qu'on se soit opposé a la recherche desdites finances, voire qu'on ait voulu disposer les commissaires a mal seruir par certains langages, plains de violence tendant a vne mauuaise fin, sadite Maiesté scauroit d'estranges choses, dont on ne luy ose parler, & cognoistroit qu'on luy a faict plus de desseruices en ce subiect quelle ne pense, & qu'on luy pouuoit faire auoir vne grande vtilité de ceste recherche avec la bien-veillance de son peuple, & l'estime de ses voisins, ce qui est tout au contraire, car il semble que ceux qui manient absolument ses affaires, ont dessein d'obliger particulièrement a eux cōtre l'interest du Roy & de son peuple toutes sortes d'officiers de Iustice, & de finance qui sont subiects a reprimende, & non les gens de bié qui restent entre eux lesquels peuuent seruir

le Monarque & la Monarchie estant toujours autant ennemis de la confusion comme les autres desirēt qu'elle soit maintenue pour leur vtilité.

Quel autre bon Mesnage c'est il encor fait au preiudice de l'honneur & de l'vtilite du Roy en ce qui c'est passé pour les Receueurs des re-tes de la ville de Paris, est ce pas vne forme de proceder maudite & toute remplie d'iniustice, tant contre la Majesté que contre lesdicts receueurs, peut on nier qu'on n'ait rendu vne tres grande iniustice ausdits receueurs de leur auoir sans forme de Iustice prins leur bien, & osté l'honneur a la face de tant de Cours & Iustices Souueraines, on ne peut pas dire que ce feust faute de iuges pour faire leur proces puis qu'on estoit au milieu du priué Conseil, du grand Conseil, des Cours de Parlements & des Aydes de la chambre des Cōptes & de la preuosté de Paris, neātmoings on leur a rauy sous le nom du Roy le biē & l'honneur, sans qu'il y ait eu sentence ny arrest contre eux n'y mesme qu'il y ait eu examen de tesmoins, ou qu'ils ayent seulement esté accusez par aucune partie ny denonciation.

On dira que ça esté bien fait de conseiller a la Majesté de deposseder ces gens la de leurs offices, apres auoir eu mille plainctes du peuple de leurs diuerfes maluerfations, & voyāt l'opinion vulgaire, & leur renommée les declarer trop coupables, comme c'est la verité que le cōseil de foy estoit iuste, mais il y falloit garder les formes prescrites par les ordon-

*Iniustice  
contre le Roy  
Et les parti-  
culiers.*

*C'est la ve-  
rité que cha-  
cun les croie  
trop coupab-  
les, & d'au-  
tant plus  
grande est  
l'iniustice  
qu'on rend  
au Roy de  
ne les cher-  
cher.*



nances, & ne l'ayent point fait, il falloit depuis ce temps-là rechercher exactement la vie desdits Receueurs, pour faire voir qu'écourçables formalitez n'ayent esté gardees, pour les tirer de leurs charges, on ne leur a point fait d'injustice au fonds & qu'ils méritent vne plus grande punition que celle qu'ils souffrent, le tout afin d'oster le blâme qu'on donne a sa Maiesté d'auoir commis cet acte de puissance absolue contre la reputation. C'estoit le chemin propre a tenir en cet affaire, au lieu de faire commettre ceste injustice au Roy, & laisser son honneur engagé, puis qu'il se pouuoit, & se peut encor facilement desgager, ce pendant on ne fait aucun semblant de vouloir remedier a la faute commise, au contraire il semble qu'on veuille laisser les choses en l'estat qu'elles sont pour n'esteindre pas ce pre-  
 texte de parler.

*C'est faire  
porter une  
perte au Roy  
l'empeschant  
de rendre  
justice.*

*Puis qu'on  
ne les vouloit  
faire iuger  
coupables il  
falloit accep-  
ter les 6. cent  
mil liures,  
qui eust fait  
coniecturer*

Est ce pas aussi vn mauuais mesnage d'auoir empesché sa Maiesté de prendre six cens mil liures que lesdits Receueurs luy vouloiẽt donner, pour auoir la mesme compunction des autres Financiers, y a il si foible esprit au monde qui ne puisse mal iuger de ce fait, & qu'il ny ait du dessein ou de la passion considerant ce qui vient d'estre dict, touchant la compunction des financiers, & voir encor quel'on commet tant d'injustice pour maintenir en la place de ces Receueurs, vn homme aussi mal reputé qu'eux quel'on poursuit criminellement pour ses faulcetez, & qui est tant desagreable au peuple qui est ledit Montauban.



Or que diront maintenant les plus clairs voyans esprits de ce siecle, en considerât toutes ces formes de mesnage, seront ils pas forcez de confesser qu'elles sont preiudiciables, & ne sont point representez icy par des discours imaginaires, au contraire qu'il n'y a rien plus veritable que tout ce qui est cy deuant allegué, il n'est pas possible d'y contredire, car la France, & tous les François scauent qu'il y a encores plus a dire qu'on ne dit, il ny a que le Roy seul qui ignore le mal, qu'on luy prepare, & n'y a que la grande bonté, & la trop de confiance qui le luy font ignorer.

Mais que dira vn iour sa Maisté de tant de Princes Seigneurs Officiers de la Couronne, Magistrars de Cours souueraines, & autres personnes de probitez de suffisance, & de qualité qui sont spectateurs de l'establissement & du cours de ce desordre, & qui sont tous les iours pres d'elle sans l'en aduertir, pensent ils que le Roy soit satisfait d'eux, quand il aura cognoissance de ce qui se passe, & qu'ils luy diront pour leurs excuses de ne luy en auoir donné aduis, qu'ils portioient vn extrême regret de le voir trompé, & mal seruy, mais qu'ils craignoient de le fâcher luy faisant voir ceste cōfusiō, qui prouiet de la faute de soing ou des desseins cachez de quelques vns de ceux en qui sa Maisté se refie, ce ne luy seront pas des satisfactions valables, il a esté bien necessaire qu'on luy ayt parlé de puis quatre ans de personnes qu'elle affectionnoit avec passion, & neantmoins on na pas veu qu'elle ayt

leur coulpe  
Et aucune-  
ment des-  
charger  
l'honneur du  
Roy.

Persuasion  
aux officiers  
de la Cour-  
ronne &  
autres per-  
sonnes de  
qualité pour  
les imiter  
d'aduer-  
tir le  
Roy.

voulu mal à ceux qui luy ont donné tel aduis.

C'est vn Monarque dont l'esprit est si penetrant, & tant iudicieux qu'il scaura bien discerner le vray d'avec le faux, & la calomnie d'avec la iuste accusation, & verra bien encor s'il le mal qu'on luy faict est commis par dessein, ou par ignorance, car il ne s'ensuit pas que ceux qui faillent en le seruant, commettent l'offence par malice, & de propos delibéré, il se peut faire que c'est par negligence, ou pour n'estre assez entendus aux affaires d'estat & en ce cas la Majesté les peut instruire pour l'aduenir, & establir pour le present vn meilleur ordre en ses affaires, donnant plus grâde liberté aux gens de bien les bons seruiteurs de luy parler de ce qu'ils verront de la en auant preiudicier son seruice: cōme a la verité, il est tres-necessaire que sa Majesté se rēde plus accessible en cela, & qu'elle face croire qu'elle estime ceux qui la seruent sans artifice.

*Le Prince  
blasmé par  
les fautes des  
siens.*

Est-ce pas pitié de voir vn Prince bon, charitable, equitable & clement, estre iniustement & par la faute d'autrui, soupçonné des vices contraires à telles vertus, & comme ce pourroit-il faire que les souspirs, voire les larmes de tant de veufues, d'orphelins, de pauvres familles ruinees, & de gens de guerre incommodez & estropiez ne fussent accompagnez de plainte qui les accusent deuant Dieu, pensant que leurs afflictions & desplaisirs viennent de luy, bien qu'il en soit innocent, seroit il possible de sentir tant de maux sans s'en douloir, & que ceux qui en entendent les ge-



missemens n'en eussent compassion, & ne partageassent par charité au mescontentement des offencez.

Si donc les subiects sont mal contens en general les vns pour estre mal traictez, les autres pour auoir pitié du mauuais traictement de leurs compatriotes voire de leurs parens & allies, & que tous ensemble se plaignent du Roy, de ce dont il n'a nulle coulpe ceux qui luy causent ce malheur, sont ils pas reprehensibles, & ceux qui le sçauent & ne le disent, sont ils pas blasmables, veu la consequence du fait.

Faut il attendre a parler que nos ennemis se soient habillement seruir de nos confusions pour nostre ruine, nos derniers troubles ne nous seruent ils point d'exemple assez recent pour nous y faire penser, veult on plus grand tesmoignage du desespoir qui se loge peu a peu dās les cœurs Frācois, que de voir qu'ils se soit trouué depuis dix ans, de si miserables, & en si grand nōbre qui ont attenté, & voulu attenter à la vie, & à l'estat de leur Prince legitime, & chacun sçait combien il se parle & escrit librement des actions du Roy, sont ce pas des presages de miseres, & des auant coureurs de diuision, fit on pas le semblable au feu Roy Henry troisiēme, quatre ou cinq ans deuant la reuolte populaire pour le rendre mal voulu, & odieux a ses subiects par mil diuers pamphins, & libelles diffamatoires, non, non, il ne fault pas desirer d'en voir d'auantage, il ny sçauroit arriuer s'y peu d'augmentation que le

*Ceux qui*

*sont cause de*

*faire blas-*

*mer leur*

*Prince sont*

*reprehen-*

*bles.*

*Tesmoigna-*

*ge assuré de*

*la mauuaise*

*volonté des*

*subiects qui*

*verifie ce qui*

*est dict cyde-*

*uant.*

*Comparai-*

*son a noter.*

*Louanges du*

*Roy.*



remede n'en fust difficile.

*Dans vn  
nombre de  
malcontens  
il se trouue  
toufiours.  
quelques de-  
sespererz.*

*Il faut que  
l'ordre re-  
uienne, mais  
qu'il faut  
craindre que  
ce soit par  
violence.*

On peut dire avec verité que depuis cent ans il n'y a eu Prince sur la terre contre lequel on doit moins conspirer que contre le Roy, la domination duquel est si douce & agreable aux gens de vertu & de courage, pour ce qu'est des qualitez particulieres de sa persõne & cependant il ne s'en remarque point contre qui on ayt tant entrepris, homme qui en est la cause que ceux qui batissent a dessein ou sans y penser vn magazin de mal contens dans l'estat, dont il sort toufiours quelques desespererz, faciles à persuader, & porter au mal, tesmoins ce que nous auons veu de fraische memoire, & ce que l'on apprend encor tous les iours, dont la Maïesté n'est aduertie.

Cependant s'y faut-il necessairement que l'ordre reuienne, soit par la prudence du Roy, ou par l'esclat de quelque mauuaise reuolution, le desordre ne pouuant passer certains termes, desquels nous voyons le nostre fort proche.

Toutes les Monarchies, les republiques, & les familles, n'esprouuent en leurs formes de gouuernement que deux sortes des changemens qui rentrent toufiours l'un dans l'autre, ou pour mieux dire qui se chassent toufiours l'un l'autre, ces changemens font l'ordre & le desordre, desquels on voit naistre plusieurs accidens bons & mauuais, l'ordre est de plus longue duree & plus malaisé à destruire, l'autre a ses mouuements, & ses fonctions si plains de violence & qu'il ne peut regner longue-  
ment &

ment & les Monarques, les gouverneurs des republicques, & les Peres de famille ne peuvent auec trop de soin & de vigilance, tascher à l'establir l'ordre quāt son cōtraire est arriué aux lieux ou ils dominant & commandent.

C'est pourquoy les bons & fidelles seruiteurs de sa Maiesté ne doiuent cesser de la solliciter, de remediér au mal qui nous faict ressentir le desordre ou nous sommes tombez, & tout homme de bien, doit contribuer tout son pouuoir pour empescher que le mal dont nous menace ceste confusio n'arriue n'y ayāt personne pour peu qu'il ait d'intellingēce aux affaire du monde, & d'affection au bien de sa patrie qui n'ait assez de subiect de l'aprehēder & de considerer qu'apres la rupture de l'ordre de la Iustice & par consequent de toute police les Royaumes & les republicques ou cela aduient, tombent bien tost en quelque changement, ou du tout en ruine, & decadence.

Les guerres ciuiles, partialitez, & soublesuemens populaires (car les histoires de ce Royaume nous tesmoignent y estre arriuees en diuers siecles pour mesmes subiects) seruent d'auctorité a ce discours, qui se peut encor appuyer par la raison deces maximes qui se disēt que la coufusio & le desordre de la iustice engēdrel'impunité des vices, que l'impunité des vices apporte la licēce de les commettre, que ceste licence faict naistre la desobeissance des inferieurs al eurs superieurs, & le mespris des bonnes loix, que de ceste desobeissance vient la haine, & les conspirations des subiects vers

*Exemple des  
malheurs  
passez pour  
appuyer ce  
discours.*

leurs Princes, & que les conspirations mettës  
souuent la vie & l'estat des souuerains en ha-  
zard: il est d'oc necessaire de rapeller l'ordre &  
le reſtablir comme protecteur de nostre repos  
chassant son contraire par la reformation des  
abuz quil'ôt estably, puis qu'il demeure pour  
constant que de la confusio s'engendre la di-  
uision, qui ruine les estats & republicques &  
par consequent que ceux qui sont caule de la  
confusion, qui la recherchent: ou qui la tolle-  
rent; pouuant faire le contraire, sont vrais en-  
nemis du Roy & du repos publicq.

*Le desordre  
qui comman-  
ce aux af-  
faires du  
Roy Henry  
troisiesme.*

Le desordre qui arriua aux affaires du feu  
Roy Héry troisiesme print son origine par l'ar-  
tificieule traine dont les ennemis del'estat  
vserent pour mescontenter generalemēt son  
peuple se seruant du peu de soin que les prin-  
cipaux de son conseil auoyent de s'opposer a  
leurs desseins, estans la pluspart mal contents  
des auctoritez & des trop grands biensfaicts  
qui se donnoyent a quelques mignons & ne  
pésant eux mesmes qu'a leur profit particulier  
& les ennemis cognoissāt que le Roy n'auoit  
autre desir que d'amaſſer de l'argēt pour le des-  
pendre en les diuerſes affectiōs, & nō au biē  
del'estat & ayant par infinis artifices & par  
personnes interposees faict proposer vn nō-  
bre incroyable d'inuentions ruineuses pour  
leuer des deniers au mescontentemēt del'E-  
glise, de la Noblesse, & du tiers estat, & en fin  
indroduit ceste pernicieuse inuention des par-  
ties & des partisās iusques a faire fournir tous  
main argent & cautions par leurs Ambaſ-



fadeurs comme il fust secretement donné a con-  
noistre a sa Maieſté & qu'il ne reuenoit que le  
tiers de la valeur desdits aduis a son profit: a-  
pres qu'ils eurent par ce moyen diuerty & al-  
teré l'affection du peuple qui se meſconteroit  
de voir la substance ſeruir a enrichir leſdicts  
partisans Eſtrangers, qui eſtoient tous Espa-  
gnols ou Italiens il feust facile a nos ennemis  
d'acquérir & d'entretenir de nos propres de-  
niers des pensionnaires partisans d'eſtar & de  
faction comme ils en auoient acquis pour ce  
faict des Finances: & ce qui eſt encor plus a no-  
ter en ce faict c'eſt qu'au temps ou les affaires  
du Roy alloient plus mal, c'eſtoit lors qu'on  
s'efforçoit pour luy bander les yeux de luy fai-  
re croire qu'il eſtoit le plus grand, & le plus re-  
doublé Monarque de la Chreſtiété, & en ceſte  
vanité on luy faiſoit meſpriſer tous aduis des  
factions & conſpirations qui ſe faiſoient con-  
tre ſon auctorité, & tenir pour indifferent ce  
qui eſtoit trop conſequentieux:

*Considera-  
tions neces-  
saires.*

C'eſt pourquoy la Maieſté conſiderant la  
ſubſtance de ce diſcours, les exemples du paſſé,  
les preparatifs que ſes voiſins font pour nuire  
a ſa grandeur les diuers partis qui ſont en ſon  
Royaume & autres choſes qu'il n'eſt beſoing  
icy, ne meſpriſera s'il luy plaist l'aduis qu'il luy  
eſt donné de remedier aux cauſes du meſcon-  
tentement qui ſ'eſt mis & ſe met encor de  
iour en iour parmy ſes ſubieſts, & de couper  
chemin aux diſcours trop libres & incōſidere-  
z qui ſe font de toutes ſes actions, autrement on  
verra augmenter les preparatifs de noſtre ruy-

*Considera-  
tions neces-  
saires,*

ne, si Dieu n'y met la main, car cest la verité que sa Maïesté est si mal seruie & avec tât d'art & de dessein, qu'on luy celle la pluspart de ce qu'on deburoit luy faire cognoistre, & que quelques vns en qui elle se fie ne luy parlent que selon ce qu'ils croyent estre de sa passion, & non comme il seroit necessaire pour le bien de son seruice, Ce qui se fait a diuers desseins, Bref s'il luy plaist iecter l'œil aux fondemens de la reuolution passée, elle verra que les mesmes principes sont suiuis maintenant.

*Autres con-  
siderations  
qui ne sont  
point à mes-  
priser.*

Sa Maïesté considerera encor s'il luy plaist qu'en ce mescontêtement general, principalement quant il est suiuy d'animosité, est cause sur ce qui est allegué que chacun essaye a nuire & a voir le Prince reduit a quelque necessité, les petits taschent a animer les grands de leurs mesmes desplaisirs, & les grands qui sont ambitieux sont bien aises d'entendre librement parler pour en faire leur profit, & sonder les courages & volonteé afin de s'en seruir en temps & lieu & cependant les disposer tousiours peu a peu a leurs desseins & sur tout a faire que chacun desire la guerre comme de fait la pluspart des Nobles & tous les gens de guerre, la desirent pour diuers subjects & generale-ment pour voir le Roy forcé a faire plus d'estat d'eux qu'il ne fait, tous les coupables & Criminels la souhaitent, & toutes sortes de confusion, pour eüiter comme il est dict, la peine qu'ils croyent auoir meritee les mal-contens la cherchent, aussi les vns pour se venger, les autres pour veoir leur Prince en peine, & par ce

moyen le reduire a leur donner quelque satisf-  
faction , & voila le bien qui se prepare a nostre  
Monarchie.

Cependant il est facile de remedier à tous ces *Remede aux*  
maux & pour y commencer il se pouuoit faire *maux qu'on*  
sept ou huit reglemens par sa Majesté dont les *preuoir.*  
déclarations porteroient le peuple a vne gran-  
de esperance de bien a l'aduenir tant pour ce  
qui regarde la satisfaction des iustes debtes , &  
la recompense des bons seruices , pour le resta-  
blissement de la iustice & le tout se peut faire  
augmentant le reuenue de sa Majesté comme  
il luy sera monstré lors qu'il luy plaira faire co-  
gnoistre qu'elle en ait les propositions agreables.

Entre ces reglemens, le premier ou l'on de- *Reglemens*  
ueroit mettre la main , seroit à changer la forme *necessaires*  
dont se tient le Conseil d'Estat , & y r'apeler les *sans lesquels*  
personnages qui luy font meriter ceste qualite *en vain on*  
lesquels le desordre qui s'y commit en a ban- *travaillera*  
nis , & qui toutesfois sont les vrais conser- *au restablis-*  
uateurs du bien public , comme ayans plus *sement de*  
d'interest au bien & à la grandeur de l'estat que *l'ordre*  
nuls autres , est-il possible qu'il y ait des hom-  
mes plus interessez au bien , & à l'honneur du  
Roy , & du Royaume que les Princes du sang,  
apres eux les autres Princes , Prelats , & Sei-  
gneurs , les officiers de la Couronne , vieux  
Magistrats , Ambassadeurs & vieux Cappitai-  
nes. Cepédant ces gens là ne vont plus au Con-  
seil , sinon lors que quelques vns d'eux en sont  
requis & importunez par des particuliers qui  
redoutent vne iniustice , ou bien que leurs pro-  
pres affaires , les y appellent , & au lieu qu'ils



tenoiët a honneur le temps passé d'entrer en ce Senat, ils en dédaignent maintenant l'entree cōme si ce n'estoit qu'un simple auditoire & cohue de Iurisdiction inferieure, & a la verité s'y on y veut bien regarder on confessera que ce cōseil horsmis Mōsieur le Chancelier quelques Prelats & cinq ou six qui ont esté Magistrats des Cours Souueraines, & Messieurs des Requestes de l'hostel, est cōposé de personnes plus capables d'estre Banquiers, Partisans, fermiers & sollicitateurs de procès que Conseillers d'estat.

On pouuoit dire en les flattant que ce soit gens de Finances, dont on a tousiours besoin aux Conseils d'Estat, & de guerre, ne se pouuāt rien acquerir ny conseruer sans argent, soit en la paix ou en la guerre. A quoy on respond que cela seroit bon si en effect ceux dont on parle estoient bons Financiers, gens d'Estat, mais les mauuais mesnages qu'ils ont faicts comme vous auez veu, & auxquels ils continuent encor, tant en la forme de leuer les deniers, qu'en celle de les distribuer, font croire qu'ils n'entendent ceste science, ny par Pratique, ny par Theorique, sinon en ce qui est de la simple supputation, & æconomie commune des comptables, aussi ne font-ils que dire, *ad idem*, de tout ce qui se propose, par celui, ou ceux qui ruynent l'Estat, auxquels ils seruent de nombre de voix, pour faire taire les gens de bien & bons François, qui demeurent en ce Conseil, comme inutiles, n'osans contredire ny debattre aucune chose proposee par

celuy , ou ceux qu'ils croyent auoir la faueur  
du Roy , ils se contentent de discourir seule-  
ment du desordre qu'ils voyēt avec leurs amis  
particuliers , & de tesmoigner le mesconten-  
tement qu'ils ont de n'y pouuoir remedier , &  
de n'en oser pas seulement parler.

Or apres auoir remis en ce Conseil , les per-  
sonnes de probité , de suffisance & de qualité ,  
qu'on iugera y estre necessaires , il depend de la  
prudence du Roy ; de mettre vne correspon-  
dance & concordance entre eux seulement ,

pource qui regarde le bien de son seruice , &  
non aucunement , car au contraire il est bon  
de rendre les interests separez , les vns des au-  
tres soit par leurs aages , ou leurs professions ,  
& pretensions , afin que ce soient autant de  
contrepoids a leurs intentions , pour les rete-  
nir dans les bornes du deuoir , car de penser  
que ce soit assez de composer du Conseil de  
gens de bien , ou pour le moins estimez tels , ce  
seroit trop se tromper , estans les hommes su-  
jects a tant de passions , qu'il n'y a si homme  
de bien , à qui vne enuie de mal faire , ne puisse  
venir , & plus il est esleué , en dignité , plus il en  
court de hazard , voila pourquoy il est neces-  
saire d'apporter vn grand soin & artifice au re-  
tablissement dudit Conseil , & c'est ce qui se  
trouuera fort facile , lors qu'il plaira à sa Ma-  
jesté en rechercher les moyés plus particuliers.  
& tesmoigner vn desir qu'on luy en faict ou-  
uerture.

Il seroit necessaire aussi de regler le Con-  
seil des parties , & oster a Messieurs les Mai-

*Maxime ne-  
cessaire a ob-  
seruer.*

*Il ny a si  
homme de  
bien qui ne  
puisse faillir  
& cest pru-  
demment  
delier les ho-  
mes a bien  
faire pour  
leur interest  
avec pru-  
d'homies.*



Itres de Requestes ( s'entend pour ceux qui sont recogneus aller trop viste ) le moyen de tromper mondit sieur le Chancelier sur les rapports qu'ils font deuant luy, de leurs opinions, touchant les procez qu'ils ont veus dans leur auditoire du Palais , ou seulement dans leurs maisons, particulieres ou il se commet de plus grandes iniustices, dont on puisse parler. Cela fait, le reste de la iustice seroit facile a remettre à vn bon reglement , car il ya vn grand nombre de gens de bien & d'honneur dans les Cours Souueraines qui le desirent avec passion , & qui seroient bien aises d'y mettre la main des premiers, s'ils en auoient le commandement du Roy , ce qu'ils ne peuuent faire d'office, n'ayant point de partisan en main , pour faire party des amendes & confiscations qui prouiendroient de la recherche qu'il conuiendra faire sur les menuz officiers inferieurs, & subalternes , & pour sur ledit party fournir les frais de ladite recherche , suiuant le bon vsage d'aujourd'huy.

*Les gabelles  
les aydes le  
domaine les  
Greffiers.*

Il se peut faire aussi plusieurs mesnages aux Finances de sa Maie<sup>te</sup>, & entre autres sur quatre natures, dont on peut beaucoup augmenter le fonds, au soulagement & contentement de son peuple , comme on fera voir plus particulièrement quand il plaira a sa Maie<sup>te</sup>, & est à noter qu'une des principales choses, qu'il est besoin d'observer , est de couper le cours aux partys & aux partisans , notamment comme ils se font aujourd'huy, ou ils reprennent le mesme train des caballes , qui se faisoient en  
tels



ces durant le regne du Roy Henry troisieme,  
à la ruine de ses finances, & de ses affaires, car  
il est certain que les Partyfais sont vrayes sen-  
sues du Roy, & du peuple, & qu'en trois par-  
tys qui se font de ceste façon, la Maiesté ne  
tire que la moitié du gain qui s'y fait, l'autre  
moitiés'en allant au proffit du Partyfan, & aux  
frais de l'execution du party, lesquels se mon-  
tent ordinairement au quart, estant necessaire  
ausdits Partyfais, d'auoir vn Conseil formé  
auec gaiges, & entretien composé des meil-  
leurs & plus suffisants esprits, mesmes plusieurs  
Officiers espanduz dans la Prouince, & outre  
cela plusieurs pensionnaires pres de la person-  
ne du Roy & dans son Conseil, bref cest vn  
moyen infailible de corrompre les meilleurs  
seruiteurs des Princes souuerains voire des  
plus gens de bien, par ce qu'on les dispose peu  
a peu, a la longue, a gouter le fruit & vtilité  
que les partisans r'apportent & retirent des  
partis, & la douce inuention que c'est de s'en-  
richir promptement auec vn faux masque de  
iustice sans auoir obligation au Prince, & fai-  
sant artificieusement auctoriser par arrest de  
son Conseil & de ses Cours Souueraines la li-  
berté de tels larcins qui peuuent par succes-  
sion de temps ruiner les Estats mieux fondez.

Le reste des reglements plus necessaires &  
dont il semble n'estre a propos de parler plus  
particulierement pour ceste heure, consiste a  
borner par la crainte & par l'vtilité les actions  
de toutes sortes d'officiers tant de Iustice que

*Moyen de  
corrompre les  
meilleurs ser-  
uiteurs des  
Princes sou-  
uerains.*

SI  
de Finance, & a remettre l'esperance aux cœurs  
des Nobles & gens de guerre qui sont deux  
poincts de si grande importance que de là de-  
pend vne partie de la seureté de l'estat.

FIN.